

愚

齋

存

稿

愚齋存彙卷第二十九目錄

電報六

寄北京總署直督王夔帥江督劉峴帥

寄總署

總署來電

江督劉峴帥來電

京譯署柏憲章來電

寄劉峴帥

夔帥來電

寄夔帥

又

京柏憲章來電

寄李傅相王夔帥

寄王夔帥張香帥

寄夔帥

劉峴帥來電

寄峴帥

寄香帥

寄京馮志先

寄李傅相王夔帥劉峴帥張香帥

寄直督王夔帥

夔帥來電

寄夔帥

張香帥來電

王夔帥來電

寄劉峴帥

寄李中堂王夔帥

北京比使來電

寄北京比使

劉峴帥來電

寄李傅相

湘撫陳右帥來電

寄劉峴帥

北京柯令鴻年來電

香帥來電

寄北京柯令鴻年

寄李傅相王夔帥

寄總署直督

夔帥來電

寄李傅相翁協揆王夔帥

夔帥來電

寄京柯貞賢大令

寄翁協揆

寄張樵野司農蔭桓

寄李傅相王夔帥

寄翁協揆

寄夔帥

寄峴帥

總署來電

北京比使來電

寄總署

寄駐京比使

張樵野司農來電

夔帥來電

寄總署

寄北京柯繙譯鴻年

香帥來電

寄香帥

東撫張漢帥汝梅來電

寄李傅相

寄濟南張漢帥

寄峴帥夔帥

寄總署

寄張樵野尙書

寄翁協揆

寄夔帥

李傅相來電

夔帥來電

劉峴帥來電

寄總署夔帥峴帥



寄峴帥

峴帥來電

夔帥來電

寄總署夔帥峴帥

京譯署柏憲章來電

峴帥來電

李傅相來電

寄峴帥

峴帥來電

鄂督張香帥致總署及北洋大臣電

夔帥寄香帥電

香帥來電

譯署柏憲章來電

寄峴帥

寄濟南張漢仙中丞

寄李傅相

濟南張漢帥來電

香帥來電

峴帥致香帥電

夔帥致香帥電

寄直督王夔帥津關道李少東觀察岷琛

粵督幕府楊彝卿來電

寄夔帥

駐京比使來電

寄駐京比使

王夔帥來電

寄長沙陳右銘中丞寶箴

寄夔帥

香帥來電

寄王夔帥劉峴帥張香帥陳右帥

香帥來電

點齋存稿

卷二十九目錄

六

思補樓藏版

愚齋存彙卷第二十九

電報六

寄北京總署直督王夔帥江督劉峴帥

光緒二十三年十月二十一日

濟南電初七兗州殺死德教士兩名又轉章鎮高元電  
二十日德國提督領兵上岸分布各山頭送來照會內  
開膠州灣一地限三點鐘將駐防兵勇退出女姑口勞  
山以外只允帶火槍一枝其餘軍火礮位概不准帶以  
四十八點鐘退清過此卽當敵軍辦理現在砍斷電線  
云又接膠局電稱德兵船洋報甚多派兵多名到報房  
守候發報不肯出費意在威脅照公法不宣戰除斷線

外不能不收轉云

寄總署

十月二十一日

膠局稟德兵現將章鎮營盤圍住不令出入偪令青島報房代發密碼洋報並不准收華報此時大局攸關洋人密電膠局不敢擅轉立候憲示膠州相距咫尺異常緊急云照章洋電難阻或代轉或斷線乞酌示

總署來電

十月二十二日

華洋並發不必斷線希飭局員妥辦毋滋他衅

江督劉峴帥來電

十月二十二日

德國藉案發難實則意有所在以後情形如有所

聞仍乞隨時電示爲感

京譯署柏憲章來電

十月二十二日

頃聞德兵船三艘已霸佔膠州限四十點鐘將曹州教案辦結否則失和傅相趕赴俄巴使處求調處俄已電德船請速撤兵妥商

寄劉峴帥

十月二十三日

德毀青島電線逐出防營東撫竟欲與戰 旨嚴飭不准又聞已獲犯四名又聞欲派專使赴德商辦教案

襲帥來電

十月二十四日

膠澳事借端發難無理已甚現由署電許使向外

部切實理論海使二十三抵津奉電 旨飭邀與  
商以疾辭不肯見面今早已由火車赴京章鎮來  
電德兵在澳尙無別項騷動情事鉅野殺斃教士  
盜犯已獲四名 旨飭張趕赴新任五日審明從  
嚴懲辦李力請決戰奉 旨嚴斥並諭章鎮等不  
得妄動近日情形如此就近送香帥一閱此款有  
心翻悔如何是好

寄夔帥

十月二十五日

敬電已交香帥閱德久有心佔地且挾遼事未酬勞益  
悻悻我無兵無餉豈可開衅聞託俄講解辦案亦最要



緊國債事匯豐把持迄不定比款所議小票書法允否  
尙無復信比甚富但買票者票上要國家出名當軸執  
不允恐散局然各國釐金抵借尙爲難亦未必肯公司  
出名借此鉅款一俟比復擬切實函稟首座說明此理  
成否一聽天意

又十月二十六日

聞俄使在署言接國家復電允力爲排解不使佔踞口  
岸已電調海參崴長崎俄船來華云然膠澳終恐不爲  
我有不如改作通商口岸方爲穩著

京柏憲章來電 十月二十六日

聞德使函告各國謂新得膠州口岸應開作通商碼頭請各國來定租界又章高元電二十五年德人整隊來營逼令盡數退去章據理以爭德不聽已勒令章鎮上船見其提督矣

寄李傅相王夔帥

十月二十六日

與比領事議准照四月二十四日 上諭大清國修造盧漢鐵路借銀之票據由中國鐵路總局發給此票據與小票統係遵照大清國批准由直隸總督王湖廣總督張鐵路督辦盛蓋印字樣頃比使電復允照此書法如比使來詢卽乞照准比公司來電已代僱國家工程

師俞伯德預備來華充總工程司云祈告瓶相

寄王夔帥張香帥 十月二十七日

京密電容閱在總署呈請辦鎮江至京鐵路有款千萬  
請驗先以百萬報効路成再報効百萬邸意頗動交各  
堂議如准於盧漢事有礙否云此係洋股路近款便必  
先盧漢告成東南貨客分去洋債難還比可藉口悔約  
加議准南北有路可通保漢似可緩造但不知初議何  
以舍京鎮而言盧漢聞因沿海兵險究竟改道是否相  
宜乞酌示

寄夔帥 十月二十七日

香帥電清江路萬不可修清江工興則盧漢廢矣況報  
効鉅款全是洋股可知無論何路皆不可准此尤大害  
也必須力阻望先密電常熟切阻之前年鄙人阻清江  
路電及總署復電卽飭檢錄送呈云此事不發兩帥議  
可見意頗搖動惟琴川係密告似非作爲傳聞公電力  
阻難以出示會議諸公乞酌示再擬電文

劉峴帥來電

十月二十八日

膠事理爲勢絀非圖自強後患靡已奈何以後如  
有要信仍祈電示

寄峴帥

十月二十八日

勘電甚佩自強不難須內外有同志十人堅固不搖通力合作則上必聽下必從聞德使函告各國謂新得膠州口岸應開作通商碼頭請各國來定租界又章高元電二十五德軍整隊來營逼令盡數退去是以香港視膠州矣然港在外膠在內地勢不同仗俄法之力卽能退還亦必有教案條款以膠澳屬北洋通商或是保膠之法

寄香帥

十月二十八日

又接京電云南海助容如於盧漢有礙須速設法容呈如批准卽無及云

寄京馮志先

十月二十八日

路改東道卽無西轍兩帥會商公電力阻容皆洋股照  
容辦法何難各路齊舉何難千萬報効時勢日難各懷  
私見如准容呈擬請漢端停工盧保歸京兆鐵廠還香  
帥銷差辭職事無可爲矣

寄李傅相王夔帥劉峴帥張香帥

十月二十九日

膠局勘電二十六德兵數百由海口上岸進膠城當經  
密稟在案二十七仍回青島德提督竟張貼告示膠州  
灣一帶海口凡關稅等皆歸伊經收等語現在章軍門  
已被德人拘留在青隊伍退紮趙村膠城無兵云

寄直督王夔帥 十月二十九日香帥會電

聞容闕在總署呈請報効百萬造鎮江至京鐵路先有  
粵人來鄂議清江至京路已駁止蓋清江興工則盧漢  
必廢事關大局擬公電力阻其文曰前有粵人到鄂條  
陳有洋商願合股辦鎮江清江至京鐵路允報効鉅款  
往復會商查盧漢一路爲各省中權南可通極邊之粵  
北可避近海之津是以奉 旨定議舉辦中外周知僉  
謂得要若清江別開一路則東南客貨均爲所奪盧漢  
將來斷不能集華股還洋債盧漢一路必致停廢無成  
查光緒二十一年六月初十之洞遵 旨電奏清江造

路十弊有云一國之內幹路不能多設創始偏東則近西幹路不能再舉將來引而加長如南達湘粵西達川陝均遠等語當奉電 旨飭籌盧漢如何辦法是東路不及西路有益已甚明晰中國物力異常艱窘倘屬華商資本豈能兩路並舉徒自爭競似應令該華商併力先辦盧漢如有真正華款總公司必當付以事權決不掣肘至於報効鉅款其爲洋股可知無論何路皆不可准餌我小利必受大害除駁止外但恐洋人旣聳華人出頭必不肯遽止如有人赴京條陳可否請發交韶洞等詳酌議復再請鈞處核定免礙盧漢以維大局文韶



之洞宣懷謹肅云如尊意相同即請酌改速發

夔帥來電 十月二十九日

頃接傅相豔午電云勘轉盛電與比領事議辦甚妥比使適來詢告以照准費謂即電本國銀行遵照俟得回電當照會總署備案亦允之海使於教案所索六條有承辦鐵路一款因告費如不速定恐德人又想攘奪伊頗領會希轉杏孫等因望察照

寄夔帥 十月二十九日

豔電即送香帥閱昨德使已派香帥所用之德工師錫

樂巴送來承辦蘇杭鎮甯路條款較比國權重息重如  
照允恐比翻悔未知六條內其餘五條何事乞密示

張香帥來電 十一月初一日

比款議妥欣慰德果以鐵路入條款咄咄逼人粵  
漢路亦須速定遲必爲強者所奪前面談已詳祈  
速籌卽示復膠事屢電均悉

王夔帥來電 十一月初一日

鐵路一條專指山東不與他處希留意其五惟援  
劉仲帥四川故事及以後保不再出此等案兩條  
萬難照行餘如教堂抬匾及賠失物賠此次兵費

尙無大爲難處並告香帥

寄劉峴帥

十一月初一日

德索六條一須革東撫永不敘用二淮安教主在濟甯設教賜予匾額三嚴辦教匪并償卹銀四自後中國不許有此等事五東省如開鐵路礦務應儘德人承辦六此案辦結所費中國賠償云譯署已電許使切實辯論章鎮被留未回擬託俄提督轉請釋放并懇俄出爲調處云

寄李中堂王夔帥

十一月初三日

比領事譯呈比國總公司來電借票式樣其文曰大清

國盧漢鐵路借票西歷一千八百九十七年諭准借貸  
本金四百五十萬鎊憑票發佛郎克若干每年利息佛  
郎克若干每年正月三號七月三號付利兩次本金三  
十年還完此本金股票每年隨拈出某號卽還某號本  
金若干第一次拈出之期係一千九百八年正月三號  
此票據按照以前 上諭總理衙門照會比國駐京大  
臣係爲中國鐵路總局借款一宗第一條此借款專爲  
盧漢鐵路經費第二條此借款按照總理衙門照會比  
國駐京大臣所奉 上諭准以造成盧漢之鐵路及鐵  
路所生利息全行抵押此款直隸湖廣總督督辦鐵路

大臣應盡押蓋印兼清查還此借款本利事宜此借款  
票據中國始終不得抽收稅項此款利息本金定准於  
比國某地方付給等語該領事請轉總署照允比使即  
可電復比公司趕緊印票出售答以照此書法可請允  
准該領事云此借票比國王已准免抽稅但恐中國將  
來興抽稅之例必須總署應允此款借票始終不收稅  
項竊思將來即使創開新例而此票已借在前自可免  
稅比使前來商詢乞速允准催令趕辦俾免延宕

北京比使來電 十一月初四日

查本國銀行現派准總監工之人並寄到股票式

樣本大臣甚悅辦妥合同諒貴大臣與我有同心  
焉前者漢領事面告貴大臣兩條真正辦法務特  
貴大臣鼎力將兩條作速辦妥本大臣深願此事  
辦成茲特與貴大臣道賀也

寄北京比使

十一月初五日

股票式樣均妥初四已將領事所譯華文電寄李中堂  
免稅事諒可照准前領事面商辦法兩條十月十七已  
電復貴大臣無可再改深望貴大臣趕緊辦妥以符合  
同第二款

劉峴帥來電

十一月初八日

前夔帥電海使索六款署令退兵再議海允電外  
部候復昨滬道有英京電謂俄允德踞膠德不干  
俄權爲韓事云核與尊處俄允排解之電未符恐  
英電係揣測語如有確聞仍乞見示

寄李傅相

十一月初八日

滬有英電謂俄允德踞膠德不干俄權爲韓事云如確  
大局何堪設想德在青島多發三等電硬令膠局代轉  
不出費而海線只向我索賠已託鐵路工程司錫樂巴  
電海鏡於例不符當停止轉報

湘撫陳右帥來電

十一月初八日

頃據湘紳前山東布政使湯聘珍等呈請創立湘  
粵鐵路公司集股開辦公舉現署臬司長寶道黃  
道遵憲爲總辦以專事權而通湘粵之氣並請轉  
咨電奏先行立案等因宜如何會同譚敬帥盛京  
堂並摺銜電奏及電告南北洋俾得周知之處伏  
候鈞裁該紳等原呈咨由驛遞

寄劉峴帥

十一月初九日

聞六條難盡允而退兵暫難商辦或須德國親王到後  
再說內意決不開衅失和巴蘭德密告許使已代商外  
部請速照允六款否則恐釀大禍又託克虜伯排解可



見俄不助我矣

北京柯令鴻年來電

十一月初十日

近日鴻漸知實情乃銀行苛求定要借款改爲國  
債經比使用法挽回今事在將成功虧一簣比使  
實費苦心德事緊中國受虧不淺此更有礙借款  
似宜速定至所請票式卽比使和事之方據云非  
遷就其文萬難安頓銀行然仍在改輕字面爲應  
分之事

香帥來電

十一月初十日

昨津電德事甚急查六條以鐵路爲最要不許則

難了輕許則貽害此閒現議甯滬一路流弊尙少  
若以此易彼或可解圍惟交還二字恐有別情請  
速召錫樂巴將洋文原電呈出細譯交還二字語  
意究作何解有無流弊如尙無他似可速電總署  
以此抵去一條實於大局有益而甯滬路成矣尊  
意如謂然請於今日五六點鐘過江面商一切是  
否均祈速復

寄北京柯令鴻年

十一月十一日

比使苦心我亦深知實在小票如何寫法中國從不過  
問頃已將擬改應分之事十三字電請中堂與比使商

定望告知比使總要通融勿再拘執

寄李傅相王夔帥 十一月十一日

比使電稱漢口譯文不符另電股票華文內云此借款除中國國家原有之責外十三字宣卽改爲此借款除中國國家已有 諭旨批准外十五字令柯繙譯往見比使商改頃柯電云見李中堂不允用原有之責十三字比使亦不允用 上諭批准十五字再三婉說比使允改輕云此借款除中國國家應分之事外十三字法文不改請電中堂比使再往求中堂說明後再咨署照會免生枝節等語查歷來借票語多鄭重中國從不問

信今比公司因合同稍鬆小票難售故於票上斤斤較量情亦可原前與各國議借路款無不注重國家以鐵路固國家所有也兩總督一督辦豈有三十年長命頃領事持比使來電云功虧一簣今有德事致礙借款非遷就其文萬難安頓銀行意甚著急現與兩帥熟籌限期已促國步愈艱恐比款一散更難議借所擬國家應分之事字樣語雖不通尙不著迹欲另想我輕彼重數字易之難得妥協或卽照辦或另商改惟有求中堂速與比使設法逕定電示後卽行會咨不勝迫切

寄總署直督十一月十一日

據膠電局員初十稟今午德兵數百並帶大礮數尊已佔據膠州卽派兵把守電局手持槍械威逼專發洋報仍堅不付費勢極危險職固臨刃不懼但與其被德兵拘留專爲德人所用而與中國軍報毫無益處何如將機器移設平度城現在我軍大隊全駐平度藉可通報是否可行立候飛速示遵勳自馬店掛線電稟云膠局不能自立恐仍如青島爲彼所佔應否暫移平度乞示遵

夔帥來電

十一月十一日

比款事已照轉傳相膠局速移平度以通軍報

寄李傅相翁協揆王夔帥

十一月十二日

英電俄許德取膠德許俄取韓兩不相干又聞德不願他國排解六款必欲照准但不知六款之外膠澳能否收回親王來華聞是經營膠埠而非議款者西人云款宜早定愈拖愈壞如膠失則割裂之勢成矣海鏡在滬時遣德人錫樂巴持鐵路條款來鄂請議蘇杭鎮甯借款造路雖不如比不致如俄法今日鏡海電詢錫議妥否錫乃來言德若踞膠必欲從膠造路至內地以奪津海東海關稅如蓄此陰謀亦非蘇甯借款所能抵塞故答以東案了後方可商議近日情形乞鈞示以備因應

夔帥來電

十一月十二日

頃接合肥文電云眞震電悉國家應分之事與國家原有之事權字樣無甚區別惟此使持示所譯華文下云所有盧漢鐵路及鐵路所生之利均屬擔保是仍要國家擔保以此照會總署斷不能允商令改爲均照合同所訂辦理彼謂應電比銀行候復電再辦望轉咨孫德有久踞膠澳意現議教案六條尙未合拍退兵則無期等因特聞

寄京柯貞賢大令

十一月十二日

文電原有之事權以及不符字眼均已改正甚慰上半

截因比使電文多不解故擬就領事譯文如欲就比使  
譯稿應再酌妥其文曰爲借款給發股票事遵查光緒  
二十三年四月二十四日欽奉 諭旨於光緒二十三  
年大比國借若干無名股分票款每票價值五百佛郎  
內填幾號按年起息幾釐每年各六箇月於某月某日  
給利息並將股票拈出之號均遞年閒統歸原本於某  
年某月某日初次還本按照以前 諭旨總署照會大  
比國駐京欽差大臣應允與大清國鐵路總局借款將  
此票酌設出給該款內之分數計一百四十八字照此  
亦無不可但須鈔呈傳相閱定方可照繕



寄翁協揆

十一月十二日

比款已妥但比欲將票式送署復准以堅銀行之信譯  
來華文只有數字未諧已電北洋轉商儀相酌妥卽由  
三衙會咨目今局勢比若中止他國必多要挾功虧一  
簣伏乞維持此次爲難總由於不肯擔保以後萬做不  
到容事如何

寄張樵野司農蔭桓

十一月十二日

德事果如尊料六款之外膠澳能否退還親王似非議  
款者若候彼來兵費愈大西人密言愈拖愈壞似宜力  
請早了

寄李傅相王夔帥 十一月十三日

北洋轉文電以比使所請盧漢鐵路及鐵路所生之利均屬擔保總署斷不能允商改均照合同所訂辦理彼謂應電比銀行再辦想比行注重在此小票能否出售以此爲斷其法文決不肯改則華文恐難大異頃電柯鴻年與費商或照漢領事譯文用所有盧漢鐵路及鐵路所生之利全行抵押十七字係中堂歌電允照比領事譯呈字樣咨署核准者或照合同第五條所載准以盧漢鐵路及其產業與一切屬於該鐵路之物作保二十二字係合同上字眼卽是照合同所訂辦理如比使

允改乞速定奪德使派人送來鐵路六條一將鐵路應  
修爲官路二應由國家借款以鐵路作保遞年本利應  
還五釐二八五六十一年還清三德華與匯豐承辦章程  
扣頭後來商定四另設鐵路公司盛與德華匯豐合辦  
五另招中外股分除借息外餘利中外公分六年滿國  
家借款本利還清卽行交還中國鐵路假使比款因爭  
論票式決裂不成改借英德債恐必照德使條款方能  
議成時勢如此之急趕辦尙恐不及若再拘泥過西歷  
正月三號之期比款卽不成矣宣懷待罪路工卽自請  
處分另簡賢能亦恐徒延時日迫切電陳乞賜鈞奪

見存不與  
寄翁協揆

十一月十三日

傅相以比款票式計較字眼將決裂過臘月十一卽廢約頃復相長電想蒙鈞鑒時事急矣猶在虛處拘文牽義可勝浩歎

寄夔帥

十一月十三日

復傅相長電想已轉去德使電鄂緊催成議舍比就德烏乎可然朝廷往往爲小失大驚虛受實無藥可救師能就近函致常熟數語或可免決裂

寄峴帥

十一月十三日

夔帥電膠案

旨派翁張與海使會議連日晤商將次

就緒章鎮已於初十送出濟南電德兵礮斃哨長一員  
勇二十餘名民人二名云

總署來電 十一月十三日

膠局移平度亦難杜德人不打電刻正商條款德  
使與提督豈能隔端卽提督不情之舉本署須告  
德使電阻膠局不宜深移內地卽移亦須距膠稍  
近仍爲德電遞送電費一層可無慮希飭局員遵  
辦

北京比使來電 十一月十三日

貴大臣寄來股票華文昨日接到本大臣面見李

中堂商定後半頁華文此外有柯鴻年給貴大臣  
電報言明股票有幾處小錯處卻容易改正本大  
臣一面電知本國此事將及辦妥諒不久此事均  
可辦好也

寄總署

十一月十四日

十一已飭平度將膠州青島線仍接通轉報膠局未撤  
因德兵持槍到局學生均逃走現又飛飭將線接通則  
平度與膠州一樣轉報因德報皆從青島電線打來非  
送來也但請囑海使告提督勿派兵恐嚇電局免致逃  
散

寄駐京比使 十一月十四日

股票華文已妥柯電來下半頁昨已轉電李中堂請貴大臣往詢即可照辦並望一面電催銀行速即辦妥勿再延誤此次貴大臣甚費心也

張樵野司農來電 十一月十四日

膠事愈拖愈壞常熟與鄒見同日內當可商結已電竹使德王弟之行膠州營局電報張皇東撫欲蹈前轍不知彼己期以陳言邀譽北洋亦改常度奈何

夔帥來電 十一月十四日

元亥電已照轉舍比就德萬無此理姑看今日電  
去合肥復電如何倘仍有游移當再爲總署透澈  
一言不可專致琴川也

寄總署

十一月十五日

章鎮寒電膠電局爲德兵占據機器全被毀壞局員仍  
奉飭回膠接線惟膠城旣佔勉強搬回恐專爲彼設我  
軍不能打電應請卽在平度設局以便軍報云已令暫  
設平度仍將膠線接通如德電來亦仍照轉

寄北京柯繡譯鴻年

十一月十五日

上截卽與李相商妥兄等便可出京昨法蘭吉接比使



電頭批只肯先付三十五萬鎊乃與訂明欲免存款無  
息之虧彼此公議按續增合同第四條所載由比行兌  
款於中國通商銀行之法係照鐵路工程漸大漸匯之  
法辦理惟第一次匯法於第一批應付之款內提出三  
十五萬金鎊不問鐵路之進境如何又欲免存款或出  
小息與借款實出重息之虧應由中國總公司同比國  
人員考究存款能出較大之息之法辦理等語希告比  
使此係極意通融先付來三十五萬鎊只好不動用以  
作押當

香帥來電十一月十六日

函悉比票商妥慰甚致陳中丞言湘粵鐵路電稿  
已錄送其中以鄙意酌改數處明早可入覽倭租  
界先商總署極妙惟我電穿倭界終恐將來有流  
弊耳能稍曲向內繞行其後否請與錫海兩洋人  
熟商之

寄香帥

十一月十七日

諫電及湘電謹悉今日與各工司熟商若讓三百丈鐵  
路碼頭距通濟門太遠實大喫虧姑候署復再請鈞示

東撫張漢帥汝梅來電

十一月十八日

據膠州牧稟稱德人到膠因電局委員逃逸留四

十餘人踞守電局逼令該牧交出委員並向民間  
搜尋恐滋巨患等語查德人前踞青島電局專發  
洋報不准收中國報今又欲佔據膠局應如何區  
處乞酌奪電示爲盼

寄李傅相

十一月十九日

比稿已蒙核准昨將全文電由北洋會咨此事始終全  
仗鼎力乃免決裂聞六條將議妥膠岸能否改爲通商  
口岸如必欲酬其歸遼之功甯予閩粵一島稍免燃眉  
之禍如瓊島本是法國口中物終非我有也此件師何  
以不與議俄派專使來確否

寄濟南張漢帥 十一月十九日

膠局因德兵到不准發華報學生委員先後退平度設  
機昨總署電令仍與通電已飭委員回膠將青島線接  
通照常通報並囑德領事告其提督勿派兵到局滋鬧  
夏軍門又請設平度報房而無機器只得將萊州報房  
暫爲移設膠澳能否退還乞密示

寄峴帥夔帥 十一月十九日

德事如何定議膠澳如不收回俄法亦必動手後事不  
可問英倭有合保東方商務之說香帥云倭副將兩員  
日內來鄂面商要事伊兩國欲想藉此佔守長江礮台

等語但望德案早結以免羣雄覬覦

寄總署

十一月十九日香帥會電

昨准咨日本索漢口城外德國租界起沿江之地長三百丈作租界查緊靠德租界起沿江迤北長一千丈橫一百五十丈早已定爲漢口鐵路發端之地碼頭隄岸貨倉車站製造各廠學堂局棧一概在內已於五月間出示曉諭派員督同洋工司丈量釘樑繪圖購地專候水涸填土開工歐西通行公法凡鐵路應用地段不論何國民人租住悉應遷讓卽漢口新訂俄法德租界條款亦載明興辦鐵路應用地基照原價讓還不得藉詞

不允是已爲租界尙須讓還現查日本係十月初四照會鈞署已在開辦鐵路數月之後自不致膠持前說且漢口至澠口地勢窪下現築石隄二十餘里碼頭駁岸一千丈不惜數十萬資本興造係爲貼近漢口城門以便貨客上落起見若將碼頭移下三百丈全失地勢斷難遷就現飭地方官紳勘議惟有在德界千丈以外緊靠鐵路讓給租界三百丈其地亦必熱鬧但條款內須列兩條一緊靠鐵路江岸該國一年內須自築隄岸以資保障二所給界內軌道穿過之處已爲鐵路購用若干方數應仍歸鐵路總公司管業兩不相礙除已繪圖

咨復外特恐日本堅要德界緊連之地則路工改造大  
不得了與工師再三密酌或讓出一百丈尙不甚礙法  
國租界只有九十丈日商在漢較法商更少今援法例  
並告知鐵路已定實難多讓彼亦不能爭多尙可百丈  
了事尙可設法抽給此時正在築路必須速卽議定以  
免工程延擱乞與該使妥商迅賜電示遵照

寄張樵野尙書十一月十九日

奉覃電案可商結膠澳能否歸還若不歸則俄法效尤  
英倭亦有合保東方商務之說和甫電倭將神尾來見  
香帥商要事香帥謂洋報屢言英欲佔長江倭將來鄂

形跡可疑屬轉告六條如不速定歐亞人心搖惑禍恐接踵而起

寄翁協揆 十一月十九日

比票式已咨署求核准膠澳如不還必啟效尤割裂在目前不得已甯予閩粵一島以酬歸遼之功膠則爲通商口避重就輕似不失爲中策

寄夔帥 十一月十九日

南海來電六條當可商結惟云東撫不知彼已以陳言邀譽北洋亦改常度未知所指何事鄙見德國此舉各國生心甯喫他虧必須收回膠澳鈞意然否



李傅相來電

十一月二十日

比稿卽照會費使六條議候德廷覆電膠口恐難  
遽還吾未與議亦免口舌

夔帥來電

十一月二十日

德兵初入膠澳致章鎮照會及所出告示均以教  
案爲詞有以地爲質之語教案旣結當無久佔之  
理十二日曾有電奏謂叵測實在六條之外總宜  
認虧速結庶免羣雄攘臂若過於推敲六條急脈  
緩受竊恐鑄成大錯當道意不謂然有固不可遲  
延亦豈可草率此等情形該督當能體會之 旨

南海所云大約指此現調廕午樓進京當是磨勘  
議結約章也

劉峴帥來電

十一月二十二日

署電亦謂教案漸商妥膠退兵德使須候國電證  
以傳相語不爲無因夔帥電聞英將向旅大下手  
俄調三船赴旅謂杜英謀促膠議詞甘難測神尾  
游歷恐託詞有聞乞示

寄總署夔帥峴帥

十一月二十三日

德提督告示本云因教案以膠澳作質若案定而膠不  
還其第五條所索東省鐵路礦務將從膠州辦起深入

內地不僅佔利已也德總領事議以印度視之其議略甚詳已寄北洋轉送乞察閱可見膠澳之重況俄英必藉保護之名各思佔據要口法必附俄倭必附英不費兵力而割裂之勢成畿輔不能安枕矣故膠澳之得失關係全局非台島可比昔年宣懷請於醇賢親王及李中堂張勤果中丞經營膠澳詳論形勢口小而曲能守腹大而深能泊數百艘後路通直東江蘇三省爲南北洋第一重要咽喉漢納根力阻經營意欲留爲德有宣懷謂膠澳如非要區何以毛奇目爲第一兵口漢乃語塞此事傳相當能記憶今中國無兵無餉何能守此要

隘莫如將此兵口改作商埠與各國共之以杜後患然  
德王雄武視中土如釜上肉俄法英倭皆有立足之地  
彼獨無有恐落後著復自侈其歸遼之功獨無厚酬隱  
有餘憾故欲得膠澳而甘心蓄謀已久倘竟不還不得  
已權其輕重緩急誠不如以閩粵一島易之聞金門島  
彼曾屬意此皆法倭口中物不甚足重能留得山東盛  
京爲王室夾輔事機可稍緩以待布置否則羣雄相逼  
諸事將措手不及故竊謂德國此舉禍烈於倭戰也位  
卑識淺何敢妄參末議迫於焦憤冒罪密陳以備採擇

寄峴帥

十一月二十三日

俄英俱有舉動如看好一面俄真援助教案一結膠兵  
卽退如看壞一面俄德互謀德踞東口俄踞奉口此中  
消息未能預揣神尾今晚赴甯卽返國彼請酌派武備  
學生赴彼軍操習兵事似可應允

峴帥來電

十一月二十四日

漾電佩悉敝處函致譯署並另致榮張二公備陳  
利害略與台指相符亦請以膠澳改作商埠而未  
及閩粵一島此係轉圜要著尙祈大力贊成

夔帥來電

十一月二十四日並致峴帥

杏孫所陳識踞題顛力透紙背本應合湖廣南北

洋協力一言頃知海使允先結教案斂兵下船膠  
澳未肯卽退尙須另案商辦許以他口相換不允  
與商作爲通商碼頭多撥德租界海亦有難色仍  
允電請外部示是杏議已行之矣聞英有佔旅大  
意二十三日俄來三艘駐旅宋與接見頗稱融洽  
據云此來一杜英謀一催膠案其詞甚甘其情叵  
測未來以前卻先知會總署亦無法止之現飭宋  
虛與委蛇仍加戒備以上云云皆是確聞惟發署  
電時切勿提及署中作事往往秘不宣露也杏孫  
接此電後密送香帥一閱倭將神尾光臣月初曾

來北洋游歷到鄂卽此人否

寄總署夔帥峴帥 十一月二十七日

濠電諒蒙鈞覽聞俄船到旅大諒以偪德爲詞膠澳還不還當以俄德聯不聯爲斷如德不讓膠俄亦不讓旅大各就海口起造鐵路凡某國鐵路所到之處將來皆爲某國所有以保護爲名以侵佔爲實若度地勢英必無佔旅大之事恐圖他處又聞法欲佔瓊島倭將神尾來鄂晤談僅商武備學生可赴彼國習練並言韓必爲俄佔東方事危倭廷亦甚著急云膠事頗繫安危全局恐海鏡欲邀功暗中播弄聞德王初不欲大傷中國可

否電派許使爲頭等欽差授意面見德王曉陳各國牽動於中有大害於德亦無大利卽使仍推海鏡中情似可直達乞備採擇

京譯署柏憲章來電

十一月二十八日

相致許使沁電俄船分駐旅大俄使於船到先一日始聲明暫駐候膠議英倭已有煩言現議膠作各國通商口准德擇地屯煤兩全體面能速贊成爲妙膠議定後俄船必應撤退免他國藉口俄戶部允代借萬萬俾全還倭款仍照二十一年辦法感極所索利益惟接通東路須借款自辦餘均可



商請密轉俄王

峴帥來電 十一月二十八日

沁電深佩蓋籌許使面陳德廷譯署當照辦昨有  
旨令各抒所見力主膠作口岸挽各國調停蓋  
昨據探報德王弟統快船來華並尙有續來之說  
英先後有兩艦泊吳淞英將謂中日保疆土英保  
商務中能急圖聯英英必樂從是海商外部係延  
緩計英將言雖難盡信卻近事理是以致署電力  
阻前議倭將來言與在鄂語略同

李傅相來電 十一月二十八日

俄廷擬勸德但恐德意不遽退膠英固不佔大連  
灣亦未必窺長江

寄峴帥 十一月二十九日

內廷信俄則聯英無望且看退膠否如不退俄德必暗  
合翻然改計不嫌遲否英佔舟山確否

峴帥來電 十一月三十日

英將與日領日將論時局皆不約而同日憂亦切  
德王弟聞素暴統艦到必有舉動刻急改計猶慮  
其遲內意恐聯交輕重轉啟爭端德法世仇慮俄  
偏助均聯盟於俄今英日正忌俄在我聯俄之外

似宜復聯英日亦卽不偏重之意雖已略陳恐不足重卓見與香帥如亦謂然爲之一言何如

鄂督張香帥致總署及北洋大臣電

十一月三十日

二十六日電 旨恭悉膠事危迫焦憤萬分謹遵

旨擬五條一請電 旨速派許景澄爲頭等欽

差酌加一銜以重之令自謁德主則情愜易通而真意易測商辦較爲活便惟國書一時難寄到恐彼不認擬請辦就國書送海使一閱囑其電告外部一面由總署徑電德外部囑其速認速見許爲人精密穩慎雖頭等斷不敢專擅可否請由 朝

廷發國電徑達德主尤得力一此事以教案爲根  
聞德人言山東教士歷年憤鬱此案初出教士徑  
電德主言係官兵所殺必有官主使故德主甚怒  
立電兵船據膠嗣接教士續電言係散勇德廷立  
電水師提督離開膠州十月二十八日電到滬故  
水師旋出膠城此時許使擬先將教案立論言教  
案已極力速辦可優於所索卽在濟甯發巨款十  
萬由官代修一新教堂敕賜匾額仿宣武門教堂  
故事並酌賞古玩器物一面降明旨通諭禁薄  
待教士並詳述教係勸善德雖是藉口佔地然教

士之憤稍平則助勢激眾者較少一德有歸違之  
功必應酬謝德無屯兵之島必與一地惟膠灣必  
宜設法商令退還恐各國效尤俄佔旅順倭佔威  
海英佔吳淞法佔瓊州海口全失海軍無澳永無  
自強之望不可爲國矣只可以福建他島與之以  
爲酬謝或加他項利益亦可至膠改作商埠多給  
租界能如署議最妥一六條中惟山東鐵路一條  
最毒惡意在吞吸全齊硬駁彼必不允或以江甯  
至滬鐵路與之相抵海使曾遣德員來鄂商盛京  
卿及洞欲攬辦甯滬鐵路借款利息五釐二毫半

本息俱攤在內六十年還清不再還本盛京卿細核並不喫虧較招商股息尙輕如肯以此路相抵較勝且路從滬起各國牽制爲患較輕一各國乘機效尤紛紛佔地各國皆同俄亦自爲並無軒輊惟俄艦已集旅順無術麾之使去聞俄禁兵登岸囑勿驚疑且告我極力相助是俄尙有分寸尙有外面較之英來文明言索地者稍勝只可因而用之密速切懇相助但議定事成後大連灣萬勿久佔以免他國藉口我當別予酬謝總之三年以來各國蓄謀分佔橫暴無理實無善策惟有熟權利

害之輕重遠近緩急但使其害歲月稍緩距京師  
津滬稍遠尙容我於數年閒趕緊振作補救尙可  
勉力支持徐觀各國之變若各海口盡爲各國分  
踞扼我咽喉斷我南北海道四面困逼富強無資  
中國直如印度矣至此事許使與議總以能將了  
結教案與讓地屯兵劃分爲兩事最爲緊要讓地  
是酬謝他事歸教案如此則以後教案方有辦法  
否則一教案卽佔地中國斷無策以善其後也海  
使延宕專待彼大隊兵船船到立逼定議彼時各  
國勸不及勸援不及援謀不及謀險毒已極故此

時尤以迅速設法爲至要事機萬緊痛憤憂灼勉  
陳管見以備 朝廷採擇請代奏

夔帥寄香帥電 十二月初一日

讀三十電切中竅要似此大聲疾呼確情籲請當  
軸者當不致漠然無動大局安危在此一舉傾耳  
聽之教案聞已有定議膠事海使必欲作爲另案  
又以天津洋行錢債舊案勒指速結方肯商辦昨  
已忍氣借款清結不知今日已開議否俄船駐旅  
大各三艘彼此虛與委蛇尙無已挂俄旗之事此  
電並密交杏孫一閱



香帥來電 十二月初二日

頃接德國柯委員照會據稱德國租界緊鄰鐵路  
前日風聞中國意讓與日本一段以作租界則於  
德國租界大有妨礙等語詞氣甚悍鄙意擬卽據  
此電署以謝日本祈將前會電總署言日本租界  
事原稿鈔示以便聲敘

譯署柏憲章來電 十二月初四日

許使電昨德報述俄代借款事查前借甚招德嫉  
現值德事緊要應與約緩至膠案定議後再訂云  
相復以英德允合借須于預押款故部議求俄若

能諷德勿干預請轉吳王緩議教案易結膠不願  
作通商口仍欲借駐恐難諧云

寄峴帥 十二月初七日

前奉三十電卽呈香帥亦深慮俄德暗合奏復五條亦  
催速結傳相函電云俄擬勸德其艦在旅大一日防英  
一日偪德不似英來文明言索地今若聯英日空言則  
彼不信實做則先失俄歡英亦不肯爲我得罪於德蓋  
利可同沾地可分割則牽制之法不行現惟就商務結  
英抵借國債造路開礦並求其加稅須速派人與沙侯

商辦

寄濟南張漢仙中丞

十二月初十日

傳聞初六曹州又有逐教民戕教士之事以致德使又翻前案德兵進踞膠州確否乞示

寄李傅相

十二月初十日

羣疑俄德暗合謂膠失則旅大亦失未知何如國債借英責任較輕福祿受屢請續議屢斥不報初七據福電稱麥加利接津行電謂總署詢倘允准所索各款公司能否照前與福議定於簽字後一箇月交八百萬鎊餘兩箇月交清速與倫敦總行商酌等語初九又接福電稱倫敦復電云望將事交哈華託經理總署必須將允

照辦理告知哈華託福謂羅使登過告白致公司非國家知照不肯深信請卽電署告哈云究竟倫敦議借呼利與匯豐孰勝乞鈞裁

濟南張漢帥來電

十二月十一日

前准總署電稱曹州驅逐教民昨據該道府電復並無其事總由教民捏造生風德使遂故作波瀾昨已據實電達矣

香帥來電

十二月十一日

函悉法佔瓊州可駭想是佔崖州榆林港也頃閱路透電報法政府謂法在瓊州扯旗之說係屬謠

言究竟如何祈速電詢雷瓊道馮觀察爲要

峴帥致香帥電

十二月十一日

管見幸不戾於尊指得鼎言當可動聽英分地之利不敵全華通商之益且俄得佔東方要口後亦將爲英患是英之佔地與否當視各國舉動爲定華能聯英得保疆土固英所願惟明聯旣爲俄忌盛京卿就商務聯絡之法最妥日前滬道晤各領惟日領亦深慮時局惕以脣齒之義彼以三國聯合爲最要昨亦將日領言轉署矣

夔帥致香帥電

十二月十一日

此次德人之衅肇自聯俄俄誠不能拒惟太著痕迹耳現在英日相結亦勢處於不得不然尊意謂宜兼聯英日兼字大可體味峴帥發此議後曾爲譯署論議及之近日英船來旅亦切囑宋帥務與俄一律看待惟譯署如何措置尙無所聞日內方擬爲首座透切一言也教案將結而曹郡又起波瀾事本莫須有或冀尙可挽回總之德事無論如何定局終當借英以掣俄耳卓見當以爲然

寄直督王夔帥津關道李少東觀察岷琛

十二月十五日

北洋大學堂奏明頭等四班二等四班每班三十名遞

年工夫長進升至頭班頭等再派出洋此皆取法於西  
不容紊亂中國學無次序淺嘗輒止故無成效此學堂  
幸蒙督帥主持允許歷久不渝商電兩公司始樂捐輸  
成斯美舉各國稱爲中國第一學堂方冀人才輩出不  
負督帥及諸公成全盛意頃接少東觀察來函忽欲改  
六十名分學法德東三國之文是殆誤會此堂僅學文  
字不知內有分類專門工夫爲小失大弊莫甚焉前據  
丁家立面商頭等三十名應分律例礦務製造各若干  
名以後每年每類僅得數名正恐不敷派用時勢需才  
如此其急詎可一誤再誤鐵路學生同是英文宣尙不

肯假借以損大學況改習他國文字便須另聘他國教習此堂曠廢卽在目前爲天下笑且二等四班學生例應就三等學堂挑升年來蘇浙皆有三等學堂津則無之開正應挑四班生三十名本擬南二北一少翁旣欲在津多挑可否南北各半此係育才要政實不可稍有徇情南省求情者皆不收錄也再德文已有武備學堂法文似可附入俄文學堂東文或在大學堂左近另蓋數椽專設一堂費似無多拙見如此伏乞鈞裁示復

粵東幕府楊彝卿來電

十二月十六日

遵電詢馮道復電云佔瓊屯兵均無其事海口有



法船一只兵官來面言爲保護太平起見並無他  
意言雖如是惟以鎮靜處之已函王守密稟兩院  
請轉電京卿等語合電聞

寄夔帥 十二月十八日

聞德案已定膠澳租借有年限否南皮密示真電兼聯  
英日與江鄂湘三帥不約而同惟不觸不背止可從商  
務入手借債造路開礦加稅練兵須派商務大員爲專  
使與沙侯籌議不著痕迹若一萬萬再請俄保借更招  
英德之忌大局危矣

駐京比使來電 十二月二十二日

貴大臣曉得總監工西歷二月初二日到華本大臣深願是時貴大臣設法在漢口駐紮毋庸在上海法蘭吉海沙地兩員頗可依靠他等甚曉後來辦法因此本大臣想總監工卽到漢口同法蘭吉等與貴大臣商妥此事甚屬緊要該員等卽與本大臣及貴大臣同心所以該員等幫同辦理必可妥協也

寄駐京比使 十二月二十三日

柯令帶回尊函慰悉接來電總監工初二到華本大臣今日回滬公事甚多約一月仍回漢口惟總監工初到

之時必在上海先行面商一切屆時請派法蘭吉到滬  
一行因此事法蘭吉是原經手頭緒較清海沙地亦必  
到滬

王夔帥來電

十二月二十四日並致沿江沿海各省督撫將軍

頃接總署敬電稱德案辦結膠澳議與周偏百里  
爲界界外德兵全撤准建濟甯曹郡鉅野三處教  
堂曹縣單縣城武鉅野魚臺荷澤鄆城七處各建  
教士住房一所共給銀二十二萬五千兩作爲被  
殺教士償卹案犯殺兩名餘監禁本日具結希查  
照並轉電沿海沿江各省等因理合照轉

寄長沙陳右銘中丞寶箴

十二月二十五日

湘粵鄂鐵路通力合作以保利權一摺兩片會同夔帥  
香帥二十五入奏請交尊處與粵中會商籌辦三省紳  
士公呈分咨樞譚除鈔稿咨送外謹先電達發摺後暫  
赴滬膠澳被佔百里必啟效尤危慮之至

寄夔帥

十二月二十五日

膠澳百里險要盡失各國駭然以爲雖不允亦斷不能  
開戰今而後只看旅大如何以占各國動靜宣二十五  
東下到滬度歲

香帥來電

十二月二十九日並致夔帥

夔帥沁電悉橫暴非喧闐也乃英欲吞中國也俄已發蠻德復進步據路透報法亦有所圖大局裂矣語皆不虛請確探詢

寄王夔帥劉峴帥張香帥陳右帥 十二月二十九日

文匯西報言英願借國債索三端一開湘陰南甯大連灣通商三埠二准英國鐵路由緬入滇三如不能還款卽以長江一帶抵當目前須認真保守免爲別國所佔字林西報云英使已告總署又云俄法拒阻似此英之所欲亦露端倪香帥擬商總署暫緩日本償款署意允否

香帥來電

十二月二十九日並致夔帥

前聞英國欲輕息借款弟料其必藉端要挾於二十四日電奏請緩還倭債免受挾制二十七日奉旨電奏頗有可採現英議借款俄欲借灣正在未定已飭總理衙門從長計議等因欽此頃聞英藉借款索添開大連湘潭南甯三口接緬甸鐵路經雲南由金沙江至漢口不許以長江擅租他國改釐金章程署欲議允惟俄法不願等語焦憤已極查緩還倭債按約無甚大害我何必平地生波自尋禍患長江不准擅租者語意可駭卽藏有駐

兵保護之舉若果准英款則形勢權利盡爲英攬  
深入腹心上自滇川下至吳淞全爲英有是卽分  
占江南十二省矣而俄藉口佔灣重兵壓我北境  
法又圖我南方理財行政亦屬諸人不成爲國此  
卽所謂瓜分也弟未便屢瀆務懇大力設法迅速  
阻止大局幸甚頃接湘撫陳電總署問英欲借款  
湘潭開口岸辦法意似欲允英借款尤爲惶駭此  
中國存亡所關也盼速籌並祈卽電復

愚齋存集卷第二十九